

萬 有 文 庫

第二集七百種

王 雲 五 主 編

明季稗史初編

(四)

商務印書館發行

· 明季稗史初編

(四)

國學基本叢書

徐

中華民國二十五年三月初版

發行人

王

上海河南路

雲五

印刷所

商

上海河南路
商務印書館

發行所

商

上海及各埠
商務印書館

王雲五主編

萬有文庫

第二集七百種

明季稗史初編
四冊

（本書校對者 章德宣 滕秉全 鮑嘉祥）

明季稗史初編卷二十一

賜姓始末

朱成功者鄭芝龍之子也。母爲倭女。初名森。弘光時入南京太學。聞錢謙益名。執贄爲弟子。謙益字之曰大木。丰采掩映。奕奕耀人。隆武帝立。年才二十一。入朝。上奇之。賜今姓名。俾統禁旅。以駙馬禮行事。封忠孝伯。初芝龍之爲盜也。所居爲泉州之東石。其地濱海。有李習者。往來日本。以商舶爲事。芝龍以父事之。習授芝龍萬金寄妻子。會習死。芝龍乾沒之。遂召募無賴。爲盜于海中。久之。而所得不貲。崇禎中。受巡撫沈猶龍招撫。芝龍娶日本長崎王族女。凡爲日本贅壻者。例不得歸。惟芝龍挈其妻還東石。第宅縱橫數里。遂爲八閩富人。猶龍母生日。進珊瑚樹高丈許。飾以珠龍金盞。觀者豔之。芝龍從者擧生犀黃金爲甲。每出則百人如一人焉。時南安有荀慙。惠安有劉香老。皆稱富強。慙先亡。香恃強不就撫。朝命芝龍討之。戰于五虎門外。之定海所。芝龍力不敵。香弟芝虎勇甚。望見香乘大艦。指揮兵士。芝虎直前躍艦而上。香手格芝虎兵器墮之。遂徒手而搏。相持入海。俱死。芝龍旣併其衆。威震全閩。江右鄒維璉嗣爲巡撫。欲抑之。而勢彌饒。弘光帝立。封南安伯。及勸進唐藩。御極。改元隆武。晉封平國公。北兵入福州。芝龍退屯安海。樓船尙五六百艘。乃爲洪承疇所誘。必欲降附。諸將多不從。成功痛哭而諫。芝龍不從。單騎北去。芝龍旣降。其家以爲可免暴掠。遂不設備。北兵至安海。大肆淫掠。成功母亦被淫。自縊死。成功大恨。用倭法。剖其母腹。出腸滌穢。重納之以斂。丙戌十二月朔。成功會文武羣臣。移于南澳。勸王于烈嶼。設高皇帝神位。定

盟恢復。丁亥。仍稱隆武三年。移于南澳。勤王者遠近至。軍聲頗震。五月。于廈門中左所設演武場。七月。令定國公鄭鴻逵軍圍泉州于桃花山。不克。十月。從大學士路振飛。曾櫻議。頒隆武四年戊子大統曆。用文淵閣印。印之。戊子閏三月。同安安溪以下皆下。以吏部主事葉翼雲署同安事。五月。圍南安縣。不克而返。八月。同安破。葉翼雲及鎮將邱進金裕皆死之。知永歷帝駐蹕廣西之肇慶。遣光祿寺卿陳士京入朝。己丑。士京還。自行在。封成功爲延平王。始稱永歷三年。六月。漳浦守將納款。庚寅。成功南下。辛卯。二月。泉州偵廈門單薄。襲破之。曾櫻自縊。諸紳咸避于浯峙。成功自南反泉州。襲者始退。十二月。攻漳浦。知縣某出降。壬辰。正月。海澄守將赫文興舉城降。圍長泰縣。北督陳錦來援。敗之。二月。復平和。詔安。南靖。三縣進圍漳浦縣府。七月七日。陳錦爲其內史李進忠等五人所刺。以其首來降。八月。刑部侍郎王虞石至。自五指山言隆武在彼爲僧。繼而遣使至廈門。一時故臣皆不能決。九月。北師金帥援漳島。師失利。癸巳。二月。五指山復遣使來存問。諸臣言隆武帝令離五指駐平遠縣。將起兵。故臣乃具公疏。請敕驗視。卒不可得。五月。金帥以萬騎攻海澄。遇伏大敗。六月。島師南下。會潮州守將郝尙文反正。以定海李孟敬署太守事。其屬縣潮陽惠來相抗。成功赴剿。甲午。四月。清朝割漳泉惠潮四郡地。令島師薙髮。不受。潮州復陷。十一月。發水陸師。應西寧王李定國于粵東。十二月朔。復漳州府。漳屬十縣降者九。獨龍巖不下。十二月。泉屬七縣降者六。乙未。正月。破仙遊。攻半月。四月。援粵之師失利。統軍者黃梧降。級。五月。祭旗。大演陸師。戈甲耀日。集搢紳觀之。六月。祭海。大演水師。九月。南征。破揭陽澄海普寧三縣。命浚揭城。毀澄普。十一月。舟山巴臣興舉城降。發師已三月。阻風。至是已抵城下。十六日。北師再遣議和。丙申。正月十一日。始頒永歷十年。

大統歷以前年有戎事也。台州北將馬信棄其城，納降于舟山。二月，降將馬信馮用張洪德俱抵廈門謁成功。五月十日，粵師失利歸，斬其將蘇茂。閏五月，改廈門爲思明州。六月二十四日，黃梧以海澄叛，知縣王士元從之。部將康雄不從，斷其手，得墜城出。七月五日，以勇忠侯陳某爲守思明州。成功帥師北伐，奪閩安鎮，斬北將胡希孔，生擒百七十餘人。二十三日，戰于南臺，奪橋。又明日，戰于橋北，再勝。二十八日，戰于較場，奪馬二十五匹，擒延平參將張禮。八月四日，復連江。二十六日，舟山陷，總制陳雪之、英義伯阮駿俱赴海死。丁酉十二月，島上火藥局災。戊戌正月，行在以璽書通問。二月，松江徐孚遠汎海由交趾入安隆，交趾要其行禮，不聽，不得過，遂反。廈門後廈門破，孚遠遁跡，爲北帥吳六奇所藏，完髮以死。海外生一子，扶櫬歸故里，未葬，子亦死。成功會師浙海，以少司馬張煌言爲監軍北伐，抵羊山。羊山故有龍祠，海舶過者，致祭必以生羊，卽放于山上，久而孳乳日蕃，見人了不畏避，軍士競逐之。天朗波平，怪風猝至，海舶自相沖擊。義陽王某死焉。于是返旆。己亥五月，全師北指。張煌言以所部義從前驅入江，煌言兵抵瓜洲城下。明日，成功至，北師出禦，滿漢死者千餘，乘勝逼其城。成功南渡，攻鎮江。煌言泝長江，未至儀徵五十里，吏民迎降。六月二十八日，煌言抵觀音門，成功已下鎮江。水師畢至，軍聲大震。七月，哨卒七人掠江浦，取之。五日，蕪湖以降書至，成功謂煌言：「蕪城上游門戶，倘留都不能旦夕下，則江楚之援兵日至，控扼要害，非公不可。」七日，煌言至蕪湖，傳檄郡邑。江之南北相率來歸。郡則太平、寧國、池州、徽州，縣則當塗、蕪湖、繁昌、宣城、寧國、南陵、太平、旌德、貴池、銅陵、東流、建德、石埭、青陽、涇縣、巢縣、含山、舒城、廬江、高淳、溧陽、建平、州則廣德，無爲和陽，凡得郡四州三縣二十四，而下流之常鎮屬縣亦皆待時而爲降計。其時忽有

大帥單騎而反。飯于村店。店惟一老嫗。大帥遽遽問曰。今日之事如何。老嫗不知其爲大帥。因曰。聞殺北人盡矣。大帥不敢飯而去。留都亦無意降。未定而諜知島師疎放。樵蘇四出。營壘爲空。士民浮水而嬉。用輕騎襲破前屯。成功倉猝移帳質民。軍竈未就。北師傾城出戰。兵無鬪志。島師大敗。成功遂乘流出海。并檄鎮江之師。煌言趨銅陵。與楚師遇。兵潰。變姓名。從建德祁門山中。出天台以入海。成功之敗而歸也。以廈門單弱。方謀所向。中途遇紅夷船。其通事乃南安人也。謂成功曰。公何不取臺灣。公家之故土也。有臺灣則不患無餉矣。臺灣者海中荒島也。崇禎間。熊文燦撫閩。值大旱。文燦向芝龍謀之。芝龍曰。公第聽候所爲。文燦曰。諾。乃招饑民數萬人。人給銀三兩。三人給牛一頭。用海船載至臺灣。令其芟舍開墾荒土。厥田惟上上。秋成所穫。倍于中土。其人以衣食之餘。納租鄭氏。後爲紅夷所奪。築城數處。曰臺灣。曰雞籠。曰淡水。此外又有土城數十處。臺灣之城。亂石疊。高數丈。厚丈餘。用火燬之。化爲石灰。融結一塊。其門戶澎湖。湖淡水。地勢低下。海舶至此。必易舟而入。故險而易守。成功進攻臺灣。至澎湖。適遇水漲。竟以海舶渡之。直抵城下。城中紅夷不過千餘人。其餘皆鄭氏所遷之民也。以火礮攻城。城堅不受礮。灣民導之曰。城外高山有水。自下而上。統於城濠。貫城而過。城中無井泉。所飲惟此一水。若塞其水源。三日而告變矣。從之。紅夷乞降。遂以大船遷國。成功王其地。辛丑。以疾卒。子錦嗣。甲寅。福藩耿精忠反。稱裕民元年。朱錦入據漳泉二府。猶稱永歷二十八年。戊午。精忠降。甲申。錦仍歸臺灣。癸亥。錦卒。子克塽嗣。年十二。不克統領其衆。衆潰。降于清。史臣曰。成功不出臺灣。徒經營自爲立國之計。張司馬作詩諄之曰。中原方逐鹿。何暇問虹梁。又曰。只恐幼安肥遯老。杖藜皂帽亦徒然。卽當世之尊乎成功者。不過比之田橫徐市之間而

已。某以爲不然。自緬甸蒙塵之後。中原之統絕矣。而成功以一旅存。故國衣冠於海外。稱其正朔。在昔有之。周厲王失國。宣王未立。召公周公二相行政。號曰共和。共和十四年。上不係於厲王。下不係於宣王。後之君子。未嘗謂周之統絕也。以此例之。成功不可謂徒然矣。獨怪吾君之子。匿於其家。而不能奉之以申大義於天下。某聞海外尙多人物。當必有說以處此。

明季稗史初編卷二十二

兩廣紀略

華復蠡

甲申三月二十七日。梁溪發棹。逗遛茗書者一月。五月朔。渡江。六月朔。過南昌。十九日。踰梅嶺。七月朔。上新興陸道。十五日。渡海。二十一日。抵臨高任。署無室。衙無役。悔三百金資斧至此也。每二更。聞雞啼聲。愀然曰。此亂徵也。胡爲乎來哉。方匝月。生熟黎以署令而破城。先一日。居民告我。於所寓前後書新任某寓此。則無患。是日早爲之。署令已戮。及母妻矣。慘哉。貪酷可爲哉。我宵晝廢寢。飡招撫者六十日。至十月。府道拏脅從。保全者千餘家。推官相公欲殺無辜。我力阻。逢怒。十一月。遂愆本道林次翥。以坐視不救。幸災樂禍。責我。因罷官。舉邑紳民哀之。哭而送者數百人。植去思碑於城隍廟西。以誌變亂時得賢父母。斯時適適然釋重負也。周孚先棄我去。就儋州陳知州館。子養隨我寓遷居瓊臺。望五指插天。並緣海尋水落石出處。東眺大洋。見巨濤如山而來。初驚怖特甚。後則數其濤之大小而樂焉。乙酉年六月。殺署令事復發。以閩地爲皇居。其家屬特奏故也。欲提該邑紳民問罪。舉國狂走。我又爲之出銀八十兩於粵東臬司。寢其事。十一月。周孚先卒於李司李署。停棺小北門。復爲葬之。丙戌年二月。天衢爲道府所拏。逃入瓊府。依我。時春夏交。城外野雞。每夜啼。惡之。後入秋冬益甚。曰。必亂徵也。去之。十月朔。攜家眷過海而北。客雷州。二更雞啼更甚。棄去。行七百里。上廣西梧州府陸川縣。孚先子亦隨焉。時十一月望。舊令施古璜已

去任。我爲屋三楹於城。以貯眷屬。十二月朔。上北流。同古瓚下蒼梧。時古瓚已召銓曹。欲趨端溪也。二十日。至德慶州。傳言羊城紹武帝已爲清朝所除。古瓚不敢再下。我獨往。二十二日。入肇慶。擁戴首相丁魁楚者。嘯聚要銀。至二十五日。早晨。猶遇退朝官。拖朱施施。少刻。永歷帝以兩人轎下小艇走矣。我有一小艇。下河隨衆而逃。除夕傍晚。遇古瓚於滕縣。丁亥年元旦。舍舟從陸。古瓚止於北流。我仍回陸川。時已元宵夕也。陸川縣城野雞。又復二更啼矣。心雖惡之。計亦無他之。二月初六日。古瓚忽挾家眷仍奔陸川。依我者四月二十二日。清兵大至。百室安堵。我止費銀三錢爲一飯。以待浙人。嗣三四月。舊總戎陳邦傳潛於賓陽。始則縱兵劫掠。後則被搶者率多追隨。以肆劫掠。自四月初一日破容縣。五月初五日破北流之後。遍地皆賊。皆曰恢復兵也。五月初六日。將家眷寄入深山之大橋村。山水田土佳絕。幾欲家之。因有幾擔木香在城。不欲遠去。離城數里。棲一庵中。至十五日。陸川縣破矣。我亦被掠。送入監一夕。索銀五百兩。我以一妾與之。彼贈我銀八兩。深入大橋。周孚先子棄我入博白。陳邦傳部下爲參將。七月內。家眷染瘴氣。初七家婦亡。二十五先妻亡。至八月初。婢僕輩死者五人。我父子亦大病。同入城。寓城東紫銅坡。十六日。孫時顯者率兵攻雷州。路經我寢室。釜室俱罄。父子二病體受其毒。拳者累百。與死爲隣矣。二十五日。周孚先子提兵過陸川。來看我病。九月初一日。遷入陸川署令內室。因念家鄉骨肉俱喪此地。戀此何爲。十月十五日。將先妻家婦之柩焚焉。攜其殖一千五百里。上南寧府。經綠珠貴妃故里。山水奇秀。甲天下。知南寧從未經兵火也。定兒并妻不從。十一月二十二日。入郡城。人物繁庶。糧食便易。昔號爲小南京。猶然樂土。意欲居之。適一浙人送一梧州女子。吾大兒遂買屋四楹於治前。蕭元圃之對門。復有盛巷項竹。

匠之族。國初至此。甲第聯綿。現兄弟叔姪舉人四人。與我爲家人好。亦足樂也。至戊子三月初十日。永歷帝又踰躑而至矣。斯時見有隨駕者。吾常吳元聲。浙東嚴秋冶。江右王登水。蕭韓若數人耳。四月杪。廣州李成棟者。忽反投明朝。遣洪天擢潘曾緯李綺三人齎疏迎駕。六月初十日。永歷帝駕下肇慶。時南寧城野雞又二更啼矣。我決意東下。苦無舟。至七月十三日。丹陽賀退庵與吾一舟。方欲解維。退庵爲仇人所劫。行李被搶。將及於我。我急訴之而止。退庵飄驚。不知何往。我身自操舟。月白風清。迅水順流。任其所之。自永淳而橫州。而貴陽。而潯州。而平南。而藤縣。而梧州。而封川。而德慶。而肇慶。竟日。竟夜。三十里鼓棹而下。過德慶時。夜聞鉦鼓聲。有言曰。此皇舡也。我初不信。明日視之。是也。抵端溪西峽。時爲七月二十九日也。僑寓於東門外閱江樓。右師古璜亦在焉。賀退庵皆在焉。過龔端木令郎在田。言元琳事。爲之淚零者。彌夕。斯時凡屬相知。皆爲我揀如何好官做。不知我冷眼覷破。見宰執仍無柱石之才。羣僚率多微倖之徒。瞿稼軒官非不顯也。戊子年二月二十三夜之弔打不免。丁魁楚銀非不多也。丁亥年四月初四日夜。父子駢首就戮。生當斯世。爲官適近喪身一路。人情險惡。世事涼薄。知此筵席。決無好散場。遂以空閒觀忙官。忽聞賀退庵以特參李綺三人。三人復仇。囑成棟養子李元允繫之於監。欲絕其食。以斃之。退庵無親戚僕隸。只告哀於我。我若放手。退庵死矣。爲之用銀一百兩。以活其命。又爲之求解於太監夏國祥。以減其罪。至己丑年二月初一日。復爲之保出獄。再贖銀四兩買衣飾。四月初一日。又贈銀令之逃入桂林。後退庵不知何往。後三月初。李成棟亡之信已確。肇慶君臣各復解體。適有浙人旅亡。遺妻無養。歸之於我。我亦遷於鄉。以消夏。一年來文官之命。制於武臣之手。身登兩榜。時爲武弁揮拳屈膝。五虎一狗笑破。

人口至八月。雞又二更啼矣。甚至兩翅生距。駭云。此必大亂之徵也。宜急去。十月中。再攜家眷遷至番禺縣之石壁鄉。至庚寅年正月初七日。肇慶聞清兵破南雄。自己兵丁在城內外大搶大殺。先從官之顯者囊之重者及之。惜我不及見也。庚寅年。清朝兵馬頓首五羊城外。守禦諸人以爲萬分無虞。一浙人邀我入廣。因見天衢爲同知。宿三夕於毛子霞寓。每酒後將睡。雞輒大唱。我私念曰。如此兵圍困。雞又何啼。豈有更甚於此者。乃我出方一月。而城破矣。破城後。十一月二十日入城。見天衢一裸體也。問我討銀三兩。置衣服。妻妾被拏。又討銀二十兩贖妻出。又討銀五兩置衣被。當富貴時。不會受他一毫之惠。偏於患難相逢。眞惡緣哉。晤香山令張嘉仲。談家鄉事。甚是茫然。殊悶悶。仍還石壁。至辛卯正月。有上韶州之便。遂寄曲江。

丁魁楚

丁魁楚原以撫臺失機遣戍。贖歸。癸未年四月。擒劉超報功。王崇巖在職方。復還原職。戴罪屯田者也。至南京。弘光則授爲兩廣制臺矣。到任以來。惟崇賄賂。留都敗時。實通靖江王。後靖藩自洩其機。反爲魁楚所縛。隆武晉封平粵伯焉。丙戌年十一月。永歷擁戴。意雖出於西撫式耜。而決成之功。魁楚爲最也。當此大任。宜稍易其平生之所向矣。乃擁戴後兩月。苞苴更甚。十二月十五日。知廣城已陷。新主又逃。乃撥心腹幹事者三人。各挾幾千金。令之潛上廣城。謀入清朝主帥營內。相機作事。魁楚則將三年官橐。裝載四十號大哨船。棄永歷帝。獨上岑溪縣。專候此三人回音。此三人者。初入李成棟營爲家丁。未幾。卽密以魁楚下情告。再以珍寶進。成棟曰。今在何處。速請出。仍借重兩廣可也。三人持成棟請書上岑溪。魁楚大喜。

將四十號哨船盡行移出。丁亥年三月初四日。至肇慶成棟知之。先五里迎接。握手歡談。恨相見晚。許以明日卽仍督兩廣事。傍晚設接風酒。盡歡而散。先是魁楚三子同來廣東。先已殞其二於端溪署。止存一幷幼孫。相隨妾婢及夫人婦。則不止數百人也。俱在四十號哨船內。至三更。成棟船上傳令。請丁老爺相公講機密話。魁楚父子不敢不往。至則成棟端坐不起。兩列火炬。魁楚卽跪下曰。犯官有罪。乞饒兒子。成棟曰。令你先看兒子。卽砍其子。次砍魁楚。成棟走出船頭。高燈齊起。照耀如同白日。將家丁四十船之男人。各營分撥一人。其女人不論老少美惡。一五一十。數入李家船。聞止有一妾。於過船時投入水中。此外不曾失一針也。三年狼毒。送於一旦。不保其身。並不保其妻子。人言魁楚官囊積銀八十萬。珍珠金寶。番貨十倍之。所遺二孫。聞在李氏官頭家做奴僕。見其自言姓丁。又打頭半死云。

洪天擢

洪天擢。乙酉丙戌兩年。俱在廣東做兩司官。擁戴永歷時。自擇其地。要做高雷廉瓊四府軍門。卽以都察院副都御史寫敕駐高州。丁亥正月。清兵下高州。則攜妻子奔雷州。清兵至雷州。則攜妻子奔瓊州。清兵以無船過海。劄徐聞者一月。天擢在瓊。爲練兵措餉。索詐地方幾萬金。復擅行殺戮者幾千人。至四月初二日。先航海投誠於李成棟。仍以海道事畀之管理。至戊子年。成棟叛歸明。天擢首至南寧。永歷寵之。以銓左遣賈諭至廣慰勞成棟。朝夕同堂者。袁彭年也。潘曾緯也。李綺也。耿獻忠也。修養甲也。皆蓄髮四月餘矣。忽一席間。令在座言志。至天擢。則曰。我不願做官。若有一千銀子。養得老母。便去做和尚矣。成棟曰。好好快叫裏邊擯一千銀子。送洪和尚。速喚剃頭人替洪和尚薙髮。在席莫敢措一詞。見銀子擯去矣。薙

髮人來矣。成棟令去天擢巾帽。竟剃做和尚矣。天擢不敢道一字。只得歸去。至明日。又不好戴和尚帽。又不戴紗帽。亦不敢見成棟之面。無可奈何之極。先央人漸以不敢領銀之說。還過銀子後。再逐一解說。方許他上肇慶到任。永歷于七月二十八日到肇慶。故天擢十二月方來也。在肇慶以李用輯與之有隙。後修怨一場。庚寅年正月。聞清兵至。請爲高廉四府軍門。攜妻子復去高州。爲舊日受害之人所殺。妻子俱擄去。天擢歎人丁丑進士。向同侯淡泉二次上春官路結社。後又同榜。淡老令黃岡時。彼爲知府宗祿事。獨受其害。擁戴時。彼爲四府軍門。李武舟與有力。到瓊州卽難爲武舟一家。絕無香火故舊之情。故天報之如此。

李綺

李綺字友三。庚辰進士。松江人也。授瓊山縣知縣。在任六年。見人惟有無飯喫三字爲啓口之談資。乙酉年四月。欲上南京考選。竟自離任入廣城。六月。知南京潰。遂買屋三千。置田六千。爲安土計。八月。仍入廉。再掌廣刑館事。大兒子死於廣城。丙戌年八月。福京又潰。綺攜家眷上肇慶。遇永歷登極。授西臺。十二月十八日。知廣城又潰。永歷必走。恐侍御欲隨行。二十日。乃爲一疏。特參首揆丁魁楚。二十二日。下旨降三級調用。喜極。卽刻解維。西上梧州。至橫州。由靈山攜妻妾弱媳二大女二幼女一幼子入廉州。居城中。丁亥年二月。清兵至廉州。綺家爲地方人所搶。人口無恙。綺解入廣城。總兵李成棟仍畀廣刑館。五月中。言不稱旨。打二十板。因爲修養甲之幕賓。九月。朱統鑒起兵破廉州。綺妻尙有金子三千藏在地。時一家男婦大小俱搶散。并地中金亦去。綺在廣不知也。戊子年正月間。綺夫人與家人漸聚。第二兒亦出。相對一

破屋中真無飯喫矣。聞有同年選茂明縣知縣。今科張鳳翼者。時護行在在南寧。綺幼子閏三月初一日。至南寧府。年十七八歲。與鬼爲鄰。詢其令尊。云無音耗。亦連聲無飯喫。詢其來爲張年伯。因入見。鳳翼淡談也。送程二兩出。在寓且欲與鬼爲侶矣。候之。但云家母在廉絕粒者半月矣。望兒歸。同鄉相知者恐卒此。再致意鳳翼及早送歸。鳳翼乃送銀六兩。又程二兩。再益。又一兩。斷斷不能矣。抑爲買藥僱轎。止存三兩在身。初十日早晨出城。行不滿五十里。逢盜罄劫。身穿衣服俱去。又被大棍數十下。直與鬼爲一矣。轎夫仍舁之回。一裸體而已。此時同鄉在南寧者。共爲出衣。出被。出柴米。舊寓主人不許其入。另覓一室安頓之。至半夜。見有香一炷。然起。綺子自念曰。此必觀世音菩薩來救我。當坐起領受。久之。香不見矣。再欲睡下。仍取衣被。蓋無有也。伸手摸帳。亦無有也。及天明。所脫下之衣服及鍋頭柴米碗箸之類。盡爲偷兒所竊。方知夜間之香。非觀音大士。斯時彼亦甚無氣息。停二日卽殂。再爲告張鳳翼。贈銀二兩。凡在同鄉共爲殮之。停柩于西門萬壽庵。至四月初十日。綺至南寧。知其子已死矣。又知其妻在廉州。往迎之。止一夫人也。女之大者不必論矣。有六歲小女出招贖出。五月中。同夫人小女下廣城。至德慶。又遇盜。夫妻二人寸絲無存。及至廣。小女亦殂。至九月。李成棟以綺爲學道。己丑至庚寅十一日。皆是也。十一月初二。廣城既破。綺在肇慶陽江縣考秀才。初六日下午。後報到。急忙起身。回廣顧家眷。路遇大兵。弔綺於樹。百般拷打。隨身之物。無一存焉。及至家。已有一武將來拿。索去銀一萬矣。十一月。綺投誠。見面銀一萬。又押出助餉三萬。辛卯正月。拘入廣城。將妾出賣。又云無飯喫矣。

